

Kòkòbì ìrì ní
Pétêró
ní sǐ rǐ
Tǎ búkũ rǐ vé rǐ ǎ ùlũngará

Pétêró sǐ kòkòbì 'dìri sêé Kūrísítīyánī urukọ ní, lókí ìri ní nǐzú ámázú 'yozú kìnī, 'bá urukọ lèkí 'ì 'dì' dǐ rǐ gé. Lě lǔú Kūrísítīyánī rǐ pì ní 'yozú kìnī, lě adringará kòpivé rǐ ǎ sě ǎyĩkò Múngú ní. Kòkòbì 'dìri agá, sǐ kìnī, tǎ nǐngará Múngú ní sêé kòpì ní, ǎzini Yèsù Kúrísítò ní sêé kòpì ní, ǎzini kòpì ní ìsù 'bá urukọ' bée vùgá rǐ, lě kòpì ǎ kukí ku. 'Yo kòpì ní kìnī, lě kòpì ǎ adrikí mì be kowu 'bá ìmù' 'bá ǎngũ ìmbá' 'bá ùnjò sǐ 'bá kǎnísǎ vé rǐ pì ǎsámví gé rǐ pì vé tǎ sǐ. 'Bá ǎngũ ìmbá' 'bá ùnjò sǐ rǐ pì, kòpì rǐ 'bá rǐ pì ìmbá tǎ ùnjí sǐ, ǎzini kòpì rǐ 'yo, Kúrísítò ìgò ku. 'Bo Pétêró 'yo kìnī, Kúrísítò rǐ ìgò rá, Múngú rǐ ngá 'í ní gbiú lókí nòri vé rǐ pì ú' dǐ rá. Ìri gò ngá ú' dǐ gbi ụkụ rǐ ǎ vùrǎ gá, kòpì adri ùnjìkǎnyǎ ǎkó.

¹ Ma Sǐmónǎ Pétêró 'ì, ǎtí' bágú, ǎzini Yèsù Kúrísítò vé 'bá áyúáyú ní.

Á sǐ kòkòbì 'dìri sêé 'bá Yèsù rǐ ẹ'yǐ' 'bá gí sǐ 'bá ní ẹ'yǐ' rǐ tǐnì rǐ pì ní. Ẹ'yǐngará 'dìri tǎ be ǎmbúgú, sěkí ìmi ní tǎ pìrì Yèsù Kúrísítò 'bávé Múngú 'bá Paápì rǐ vé tǎ sǐ.

² Ẹsì múké, ǎzini tǎkírì Múngú vé rǐ ǎ ga ìmì ẹsì agá tré tré. Lě ìmi 'bǎkí ẹsì rizú tǎ Múngú vé rǐ ùnǐzú, ǎzini Úpì Yèsù vé rǐ ùnǐzú muzú dǐ dǐ.

Adringára Múngú agá rĩ

³ Múngú vé ũkpō sī, sē 'bá ní ngá ārēvú céré 'bá ní tā 'ozú āní múké āyīkō sēēpi ĩri ní rĩ pi gí. Sē 'bá ní ngá 'dĩ'bée, 'bá ní ĩri nĩj gí rĩ sī. Múngú zĩ 'bâ, 'bâ ímúkí rí ívé dīngára pōwŭpōwŭ rĩ ālēé, āzini ívé adringára múké 'dĩri ālēé 'í be trũ.

⁴ Múngú ęzi 'bá ní tā āmbúgú, 'bâ íkókí rí ívé adringára múké rĩ āní, āzini 'bâ kukí rí ęsí 'bá ní rií 'bāá tā ũnjĩ 'ozú rĩ rá, āzini 'bâ kukí rí ęsí āmbúgú 'bá ní rií 'bāá ngá drĩgé nyōŏkú drĩgé nōgó rĩ āní.

⁵ Lē ĩmi rúkí ĩmivé ę'yīngára rĩ tĩtĩ. Ę'yīngára rĩ ā vŭdrĩ gé, lē ĩmi 'okí tā múké, tā múké rĩ ā vŭdrĩ gé, lē ĩmi adrikí tā nīngára be, ⁶ tā nīngára rĩ ā vŭdrĩ gé, lē ĩmi ũtēkí ĩmi ũtētē tā ũnjĩ sī, ũtēngára rĩ ā vŭdrĩ gé, tā ęnjĩęnjĩ agá, lē ĩmi úmbékí ęsí, ęsí úmbéngára rĩ ā vŭdrĩ gé, lē ĩmi 'okí tā Múngú ní āyīkō sēēpi ni, ⁷ tā 'ongára Múngú ní āyīkō sēēpi rĩ ā vŭdrĩ gé, ĩmi ędrĩpĩj rú, lē ĩmi lēkí ĩmi lēlē ĩmi āsámvú gé sī, lēngára rĩ ā vŭdrĩ gé, lē ĩmi lēkí 'bá rĩ pi ārēvú céré. ⁸ ĩmi 'dŭkí dō tā 'dĩ'bée ārēvú ngaá céré rá, ĩri lŭ 'yozú kínĩ, ęsí ĩmi ní 'bāá 'bávé Úpí Yēsŭ Kúrísítō ri nĩzú rĩ, ũ'a ni ri índré ĩmĩ rú 'bá gá bá, pámvú ni ri índréndrē. ⁹ 'Bo 'bá tā 'dĩ'bée 'dŭpĩ ngaápi ku rĩ, índré sŭ 'bá mĩ be ęsĩpi gí, āngŭ ndreēpi ku rĩ tĩnjĩ. 'Bá tā 'oópi 'dĩni 'dĩri, tā ĩ ní ĩri trũzú ĩrivé ũnjĩkányā agásĩ rĩ āvĩ ęsí ni agásĩ gí.

¹⁰ Kúru má ędrĩpĩj má ọmvŭpĩj, lē ĩmi 'okí tā lŭpĩ 'yozú kínĩ, ádarú Múngú ũpē ĩmi nĩ, āzini zĩ ĩmi ímŭ adrii 'bá ívé ni. ĩmi 'dŭkí dō tā 'dĩ'bée ngaá sŭ 'dĩri tĩnjĩ, ĩmi ícókí í'dé ĩmivé ę'yīngára

agásĩ ku. ¹¹ 'Bávė Úpí Yėsũ Kúrísítō 'bâ Paápi rĩ ímú ĩmi é'yí drĩ ĩrĩ sĩ fi mālũngã adrizú ģnĩ 'dání'dání rĩ agá rá.

Tã Búkũ Múngú vé rĩ ní átá rĩ

¹² ĩmi nĩkĩ dō tã rĩ gĩ, āzini ĩmi tukĩ dō pá tã áda rĩ agá tĩtĩ drããāsĩyã, á lě tã 'dĩ'bée ęndĩĩ ũlũú ĩmi ní đĩ đĩ. ¹³ Má ní drĩ adrizú ídri rú rĩ gé, má ũsũ ĩri múké má ní tã 'dĩ'bée ũlũú ĩmi ní, tã ni ã āvĩ rĩ ĩmĩ ęsĩ agásĩ ku. ¹⁴ Ā'diātãsĩyã á nĩ rá 'bávė Úpí Yėsũ Kúrísítō lũ má ní uletere kĩnĩ, ma ílókō drãdrã. ¹⁵ Kúru á lě ũ'bĩĩ ũkpō sĩ tã 'dĩ'bée ímbá ĩmi ní, lókĩ má ní adrizú 'dãayo rĩ gé, ĩmi 'bãkĩ rĩ tã 'dĩ'bée áwĩ kuú ĩmĩ ęsĩ agá.

¹⁶ Ú'dógú'dógú 'bá ní ũlũú ĩmi ní 'bávė Úpí Yėsũ Kúrísítō vé ĩgōngará ũkpō be rĩ ã tã sĩ 'dĩri, adri 'yozú kĩnĩ, 'bá āzi ígá tã ni 'í drĩgé yã 'dĩni kuyé, 'bâ ri āmbũgũ Yėsũ vé 'bá ní ndree 'bâ mĩ sĩ rá rĩ ã tã ũlũ. ¹⁷ Ętępĩ Múngú sē ĩri ní āmbũgũ, āzini íngú ĩri rá. Múngú Ũkpō 'Dĩpa kĩnĩ, "Mvá 'dĩri mávé má ní lěélě rĩ, ma adri ĩri sĩ āyĩkō sĩ." ¹⁸ 'Bá yĩkĩ ũ'dúkō rĩ íbĩ íkú 'bũ gélėsĩla, ĩsú 'bâ Yėsũ pi be trũ írã uletere rĩ drĩgé 'dãá.

¹⁹ Tã nębĩ rĩ pi ní ũlũú 'bá ní 'dĩ'bée tã áda. Kúru lě ĩmi 'bãkĩ ęsĩ rizú ũ'dúkō kōpi ní ũlũú 'dĩ'bée yĩzú múké múké, ã adri rĩ sũ ĩmi ní lám bã 'yũú đĩ ĩnĩ sĩ rĩ tĩnĩ. Lě ĩmi 'bãkĩ tã ni adriĩ kuú ĩmĩ ęsĩ agá, cĩmgbá ũtũ rĩ ní ĩfũngará gá, āzini mārãbã ũ'bútĩnã vé rĩ* ní đĩzú ĩmĩ ęsĩ agá. ²⁰ 'Bo lě ĩmi nĩkĩ ámá múké 'yozú kĩnĩ, tã nębĩ rĩ pi

1:17 1:17 Mátayo 17:5; Mārãkō 9:7; Lúkã 9:35 * **1:19** 1:19 Mārãbã ũ'bútĩnã vé rĩ: Mārãbã ũ'bútĩnã vé rĩ Yėsũ 'i.

ní ùlùú, ì ní sǐ́ Búkũ Múngú vé rǐ agá 'dǐ'bée, adri 'yozú kǐnǐ, 'bá āzi ígá 'í drǐgé yā 'dǐni kuyé. ²¹ Ā'diātāsīyā tā nẹbǐ rǐ pi ní ùlùú rǐ, 'bá āzi ígá tā ni 'í drǐgé kuyé, 'bá Múngú ní ùpěé nẹbǐ rú rǐ pi rikí Múngú vé ụ'dụkọ ùlùú ùkpō Índrǐ Uletere rǐ vé rǐ sǐ́.

2

'Bá tā ímbá' 'bá ùnjō sǐ́ rǐ pi

¹ Ọtú nẹbǐ ùnjó rú ni pi anigé Īsērélē rǐ pi āsámvú gé. 'Bá rǐ 'bá tā ímbá' 'bá ùnjō sǐ́ ni pi kpá ímụ ì ìnjé ífí ìmi āsámvú gé, tā kọpi ní ímụ ímbá rǐ, ìri 'bá izaza, kọpi Úpí ì paápi tā ùnjǐ agásǐ rǐ gā sǐ, kọpi drǎ ìjǐ ì drǐgé ùgōgōlé rú. ² 'Bá tré pi ímụ kọpívé ímbángará ùnjǐ, āzini tā kọpi ní rǐi 'oó drǐnjá sēepi rǐ 'dụ nga áyu, ìri sē 'bá rǐ pi tā áda Múngú vé rǐ idede. ³ Kọpívé ẹsǐ 'bāá āmbúgú ngá drǐgé rǐ sǐ, ìri sē kọpi ìmi úbé ụ'dụkọ múké sǐ lẹzú ìmívé mǔfēngā u'dụzú ìmi drǐgé sǐ rá. 'Bá 'dǐni 'dǐ'bée, Múngú lǐ tā kọpi drǐgé ìnọgọsǐ gǐ, kọpívé drǎngará 'dụ sá ku.

⁴ Mālāyíkā ùnjǐkǎnyā 'o' 'bá rǐ pi, Múngú ku kọpi kána kuyé, úmbé kọpi ú'bé ìzāngā nyaá 'bú 'a be nǐpǐ cǐcǐ rǐ agá, cǐmgbá lókí ì ní ímụzú tā lǐzú kọpi drǐgé rǐ gé. ⁵ Lókí Núwā* vé rǐ gé, 'bá ùnjǐkǎnyā 'o' 'bá rǐ pi, Múngú ẹ ẹsǐ ícá kọpi ní ùká ùká, Múngú sē yǐjǐ tǐjǐ kọpi ìmùlùú, kọpi ùdrǎkǐ céré. Múngú pa Núwā tā pǐrǐ rǐ ùlùúpi rǐ ívé 'bá

* **2:5** 2:5 Núwā: Núwā adri sá 'bá rǐ pi ní ùnjǐkǎnyā 'ozú ùnjǐ 'dǎri gé rá, kúru Múngú ní ìri zǐzú ā údé kùlúmgbá, yǐjǐ rǐ kǎdō ímụ tǐjǐ, ā pa rǐ ìrívé 'bá rǐ pi ìrívé ānyāpá rǐ pi ā ụrụkọ pi be. 'Í lǎ í'dóngará 5-9.

éẓĩrĩ rĩ pi be drã agásĩ rá. ⁶ 'Bá ũnjĩkãnyã 'o'bá kũrũ Sôdómô vé rĩ agá, āzini Gômórã vé rĩ agá rĩ pi, Múngú zã kôpi veé ácí sĩ, kôpi cikí kuú úfúrágú rú. Múngú 'o tā 'dĩri 'dĩni, 'bá 'i nĩ' 'bá ku rĩ pi ã nĩkĩ rĩ áamá 'yozú kínĩ, 'i kpá ímụ kôpi zã ve ácí sĩ sũ 'dĩri tĩnĩ. ⁷ Múngú ípá Lótô ri ácí agásĩ ĩri ní tā 'oó pĩrĩ rĩ sĩ. Ũnjĩkãnyã 'bá Sôdómô gá rĩ pi ní 'oó drĩnjá sēepi 'dĩri, sē Lótô ní āyĩkô āluṅáni kuyé. ⁸ Lótô ri 'bá tā 'oópi pĩrĩ ni, ri adrií 'bá ri' 'bá ũnjĩkãnyã 'o'bá 'dĩ' 'bée āsámvú gé, ú'dú ālu ālu, ĩri ri ũnjĩkãnyã kôpi ní rií 'oó rĩ ndre, āzini átángá ũnjĩ ũnjĩ kôpi ní rií átá rĩ pi yĩ 'í bĩ gé, tā 'dĩ' 'bée sē ĩri ní āyĩkô āluṅáni kuyé. ⁹ Tã rĩ dō 'dĩri tĩnĩ, Úpí Múngú ri 'bá tā 'o'bá pĩrĩ rĩ pi pa tā kôpi ísú' 'bá rĩ pi agásĩ rá, 'bo ĩri tā ũkpó ũkpó ni 'bã 'bá ũnjĩkãnyã 'o'bá rĩ pi drĩgé, cĩmgbá cazú lókí ĩ ní ímúzú tā lizú kôpi drĩgé rĩ gé. ¹⁰ 'Bá ri' 'bá ẹbĩrĩ rú' 'bá nōri vé rĩ ã tā 'du' 'bá nga' 'bá, ũnjĩkãnyã 'o'bá, ũkpô Múngú vé rĩ gã' 'bá sĩ rĩ pi, Múngú ri ímụ kôpi ĩrĩnjã rá.

'Bá 'dĩni 'dĩ' 'bée ri tā rĩ 'o mužú drĩ ũkpó sĩ, kôpi āfú rú, āzini ĩlékēléná rú, kôpi ri mālāyĩkã 'bũ gé rĩ pi u'da ũrĩ ākó. ¹¹ Mālāyĩkã rĩ pi vé ũkpô ã ndē dō 'bá āngũ ímbá' 'bá ũnjō sĩ 'dĩ' 'bée vé rĩ rá drãāāsīyã, kôpi tōkí 'bá ũnjō rú 'dĩ' 'bée kuyé, āzini u'dakí kôpi Úpí Múngú ẹndrẹtĩ gé kuyé. ¹² 'Bá āngũ ímbá ũnjō sĩ 'dĩ' 'bée, kôpi ri tā kôpi ní nĩ kuyé rĩ pi ide, kôpi ri tā ĩ ní lēé rĩ 'du nga ẹnĩākō sĩ. Kôpivé úmĩ sũ ānyāpá rĩ pi vé rĩ tĩnĩ, ĩ ímụ kôpi ú'dĩ ũdrã sũ ĩ ní ānyāpá rĩ pi ú'dĩ ũdrã rĩ tĩnĩ.

¹³ 'Bá 'dĩni 'dĩ' 'bée ri ũnjĩkãnyã rú' 'bá nōri ní

ãyĩkõ sēepi ni 'o andrekelemgbe ũtúnǎ sī, kōpi ri tã ũnjí ũnjí aga'bée rá ni pi 'o mužú, vūrã 'bá rĩ pi ní ĩ úmúzu ngá nyazú rĩ gé, kōpi ri ũnjĩkãnyã drĩnjá sēepi ni 'o 'bá rĩ pi ãsámvú gé. Tã kōpi ní 'oó ũnjí 'dĩ'bée sī, Múngú ri ímú kōpi 'o ãní ũnjí. ¹⁴ Tã kōpivé rií 'oó mužú rĩ, rizú ọwũ 'bázú mužú bãdãrú, kōpi kukí ũnjĩkãnyã 'ongará ku. Kōpi 'bá úmĩ ãkó rĩ pi ĩ mĩ ũ'bã 'de tã ũnjí agá mbēlējá, kōpi 'bãkí ẹsị ãmbúgú ngá drĩgé. 'Bá 'dĩni 'dĩ'bée, trikí kōpi gí. ¹⁵ Kōpi kukí tã pirĩ rĩ ã 'ongará ãní, kōpi gōkí rií tã gōrōŋō rú ni 'oó mužú, sũ Bálámũ Bėórã mvọpĩ ní lée mũfēngã ndãá ịsụ lẹtĩ ũnjí sī rĩ tĩnĩ. ¹⁶ 'Bo nẹbĩ Bálámũ vé dōngí átá ũnjĩkãnyã Bálámũ ní 'oó rĩ ã tã drĩ ni gé. Dōngí rĩ átá sũ 'bá áda ní átá rĩ tĩnĩ, sē Bálámũ ku ívé tã rií 'oó ẹnĩãkõ vé 'dĩri rá.

¹⁷ 'Bá ãngũ ímbá'bá ũnjõ sī 'dĩ'bée adrikí sũ kídí njuųpi gí rĩ tĩnĩ, ãzini kōpi adrikí sũ ịrĩbĩtĩ yĩgọ vé ũlĩ ní vị 'dĩsĩ rá rĩ tĩnĩ. Múngú údé kōpi ní vūrã ịzãngã nyazú ambamba ni kú ịnọgọsị gí, ịri ri kōpi tē. ¹⁸ Kōpi ãfú rú, kōpi ri átángá 'bá ịzã koopi ku ni pi átá, kōpi ri tã rụ'bá nōri vé rĩ pi 'o 'bá rĩ pi ãsámvú gé andrekelemgbe, kōpi ri tã 'dĩ'bée 'o 'dĩni, 'bá ẹsị újá'bée ú'dí rú ũnjĩkãnyã agásĩ rĩ pi úbészú, kōpi ã fikí rí tã ũnjí 'oó bēsĩnĩ. ¹⁹ Kōpi ri 'yo 'bá rĩ pi ní, 'bá rĩ pi ẹ'yĩkí dō tã ĩ ní ímbá rĩ rá, kōpi ímú drĩwālã ịsụ rá. 'Bo ịsụzú 'bá ãngũ ímbá'bá ũnjõ sī 'dĩ'bée, kōpi tũgẹrĩ ri 'bá ũnjĩkãnyã 'o 'bá ni pi, ã'diãtãsiyã 'bá riipi ũnjĩkãnyã 'oópi rĩ, ịri tũgẹrĩ ũnjĩkãnyã rĩ drĩgé. ²⁰ 'Bá ãngũ ímbá'bá ũnjõ sī 'dĩ'bée ẹ'yĩkí

kôdô 'bávê Úpí Yēsũ Kúrísítô 'bâ Paápi rĩ gí, kôpi ìfúkí ùnjĩkányã nyôòkú nōri vé rĩ agásĩ gí, 'bo ùnjĩkányã rĩ gō kpá kôpi ìmũlũú ðĩ, sê nóni kôpivé tã rii 'oó rĩ gō ícá ùnjĩ ðrĩðrĩ 'dãri ndêé. ²¹ 'Bá 'dĩ'bée ã nĩkí té dō létĩ Múngú vé tã 'ozú pĩrĩ rĩ kuyé, ìri té adri múké, ìsúzá kôpi nĩkí rá, 'bo kôpi gākí tãĩmbĩ Múngú vé uletere ì ní ímbá rĩ 'duǵá ngagá sĩ. ²² Tã ì ní átá 'dĩ'bée tã áda, “Ūcógú ri úgbé, ìri gō újá ívé úgbé mbe. Ìgá ri 'i ùjĩ múkényã rú, ìri kpá gō fi 'i ùnjō ùtrêtrê sĩ ðĩ.”

3

Úpí Yēsũ vé ìgōngará

¹ Ìmi mávé ùndĩ má ní lēélē rĩ pi, á sĩ ìmi ní kōkōbĩ rĩ sēé ðrĩðrĩ ni rá, ãzini má ní sĩĩ sēé ìmi ní 'dĩ. Kōkōbĩ má ní sĩĩ sēé ìrĩ 'dĩ'bée, á sĩ sēé ìmi ímbázú ãní, ìmi kádō lãá, tã ni ã ãvĩ rĩ ìmĩ èsĩ agásĩ ku. ² Á lē ìmi 'bākí tã nēbĩ Múngú ri nĩ'báná rĩ pi ní ótù átá 'dãri kú ìmĩ èsĩ agá, ãzini lē ìmi 'bākí tã Úpí 'bá Paápi rĩ ní eziĩ ívé 'bá áyúáyũ rĩ pi tĩ gé rĩ kú ìmĩ èsĩ agá.

³ ðrĩðrĩ ni, tã má ní lēé ìmi nĩkí áamá múké rĩ, ìri 'dĩ, ù'dù ùdũ vé rĩ gé, 'bá urukọ pi ìmũ tã áda ìmi ní rii 'oó rĩ gugu, kôpi tã ùnjĩ ì ní lēé rĩ pi 'du nga áyu. ⁴ Kôpi 'yo, “Yēsũ kĩnĩ, 'i ìmvĩ ìgō rá pĩrĩ, ìmvĩ dí kuyé ãsĩ? Í'dózú 'bá è'bĩpĩ ì ní ùdrázú rĩ gé 'dãá, ãzini Múngú ní 'bũ pi gbizú vũ be rĩ gé 'dãá, cĩmgbá ãndrũ sĩ, tã rĩ pi áwíkí adrii kuú ùku rĩ tĩnĩ.” ⁵ 'Bá 'dĩ'bée nĩkí áamá rá 'yozú kĩnĩ,

Múngú gbi 'bũ pi vũ be nĩ, ri átá tị sĩ, gbi nyõókú rĩ yĩ sĩ, aco yĩ rĩ mužú ãndiãndí, nyõókú rĩ ní ìndrészú, 'bo kọpi ãvíkí tã 'dĩri sĩ ãkã. ⁶ Múngú gō yĩ 'í ní nyõókú rĩ gbizú ãní 'dãri sée tĩ, yĩ rĩ ú'dí 'bá rĩ pi, ngá ìdri be rĩ pi be ùdrãã céré 'dĩisĩ rá. ⁷ 'Bo Múngú átá ìnógósí kĩnĩ, 'bũ 'bá ní ndree ãndrũ nõri, ãzini vũ 'bá ní adrií drĩ ni gé nõri, 'i ìmú kọpi zã ve ãcí sĩ, kọpi tẽ ku 'dĩni, cĩngbá lókí 'í ní ìmúzú tã lizú 'bá rĩ pi drĩgé rĩ gé, 'bá 'i nĩ 'bá ku rĩ pi, 'i ìmú kọpi zã ve ãcí sĩ.

⁸ Ìmi mávé ùndĩ má ní lélé rĩ pi, lẽ ìmi 'bãkí ìmi drĩgé 'yozú kìnĩ, ù'dú ãlu ìndré Úpí Múngú vúgá 'dãá ìlĩ élifũ ãlu tịni, ù'dú élifũ ãlu ìndré ù'dú ãlu tịni. ⁹ Tã Úpí ní ẹziĩ 'yoó kìnĩ, 'i ìgõ rá rĩ, 'bá urukọ'bée ùsũkí kìnĩ, ícõ ìgõó mbelẽṅá ku. 'Bo adri 'dĩni kuyé, Úpí ri tã rĩ 'o mužú mädã ìmi tã sĩ, ã'diãtãsiyã Úpí lẽ 'bá ãlu ãlu ã ku ùnjikãnyã 'ongará ãní, ã drã rĩ ku.

¹⁰ Ù'dú Úpí ní ìmvízú rĩ, 'bá ãzi ícõ nĩ ku, ìri ícã ãngũ ìsú dũ, sũ ùgũ 'bá ní ìmú ngá ùgũ rĩ tịni. ãngũ rĩ ìmú lĩ 'bũ gé 'dãá kúbí be mgbĩrĩ, 'bũ rĩ kúru áfí 'dĩisĩ rá, ì ngá 'bũ gé 'dãá rĩ pi zã ve ãcí sĩ mgbĩlĩmgbĩlí, ì kpá vũ rĩ zã ve ngá 'a ni gé rĩ pi be mgbĩlĩmgbĩlí. ¹¹ Ngá vũ drĩgé nõgõ rĩ pi, ì dõ ìmú zã ve ãcí sĩ 'dĩri tịni, ngá múké rĩ, lẽ ìmi ngakí ẹzi Múngú ní, ãzini ìmi ìnjĩkí Múngú ri. ¹² Lẽ ìmi 'bãkí mị rizú ù'dú Múngú ní ìmúzú tã lizú 'bá rĩ pi drĩgé 'dãri ùtészú. Lẽ ìmi ùsũkí 'yozú kìnĩ, ù'dú 'dãri vé ícãngará vũvũ yã 'dĩni ku, ìri ícã ú'dikĩrĩṅá nõgõ. Ù'dú 'dãri gé, 'bá 'bũ gé 'dãá rĩ pi, ngá 'bũ gé 'dãá rĩ pi be, ãzini 'bá

vũ drĩgé nōgó rĩ pi, ngá vũ drĩgé nōgó rĩ pi be, ĩ kōpi zā ve ācǐ sǐ mgbĩlĩmgbĩlĩ. ¹³ 'Bo 'bā ri ẹsǐ 'bā 'bũ ú'dí, āzini vũ ú'dí Múngú ní ẹzĩ 'bá ní 'dāri ũtēzú, vūrā rĩ údékí ángírí 'bá tǎ 'o'bá pĩrĩ rĩ pi ní.

¹⁴ Īmi mávé ũndĩ má ní lěélě rĩ pi, ĩmi ní rizú ẹsǐ 'bāzú tǎ 'dĩri ũtēzú rĩ gé, lě Úpí Yēsũ ẹ ịsụ ĩmi uletere, ũnjĩkǎnyā ākó, tǎ be kírí Múngú ẹndrẹti gé. ¹⁵ Lě ĩmi 'bākí ĩmi drĩgé 'yozú kínĩ, tǎ Úpí ní ẹsǐ 'bāzú mǎdā ícázú mbělēnǎ kuyé rĩ, ku 'bá rĩ pi ní sǎ, 'bá rĩ pi ǎ újǎkí rí ẹsǐ ǎnĩ. Tǎ 'dĩri sũ nyo Múngú ní úmĩ sěé 'bá ọgúpĩ Páũlũ 'bá ní lěélě rĩ ní, ĩri ní tǎ rĩ sĩ sěé ĩmi ní rĩ tĩnĩ. ¹⁶ Kọkọbĩ Páũlũ vé ĩri ní sĩ 'dĩ'bée agásĩ, átá tǎ 'dĩ'bée cére rá, 'bo tǎ ĩri ní sĩ 'dĩ'bée ụrukọ mbamba, ífífí ni ícókí nĩ bǎ ku. 'Bá ụrukọ tǎ nĩ 'bá ku rĩ pi újǎkí ĩrivé kọkọbĩ sĩ 'dĩri ũlũú ũ'dũ be túngú, sũ kōpi ní tǎ Búkũ Múngú vé rĩ agá rĩ újǎ ũlũú ũ'dũ be túngú rĩ tĩnĩ.

¹⁷ Īmi mávé ũndĩ má ní lěélě rĩ pi, sũ ĩmi ní tǎ 'dĩ'bée nĩ rá rĩ tĩnĩ, lě ĩmi adríkí mĩ be kowu, 'bá ri 'bá ũnjĩkǎnyā 'o'bá rĩ pi ǎ úbékí rí ĩmi fí ũnjĩkǎnyā 'oó ku. ¹⁸ Ẹsǐ múké, āzini tǎ nĩngará íngápi 'bávé Úpí Yēsũ Kúrísítō 'bá Paápi rĩ vúgá rĩ, ǎ sě ĩmi tukí pá ũkpó ũkpó. Lě ẹ íngúkí Yēsũ ri mužú nyonyo! Āmĩnǎ.

Ụ'dúkọ Múké Múngú vé rị
Keliko: Ụ'dúkọ Múké Múngú vé rị New Testament+
copyright © 2017 Wycliffe Bible Translators, Inc.

Language: (Keliko)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

14717198-957a-524c-b31f-2c3197945b20